

大社老街~路竹區 (台語文)

作者：蘇晏德

大社街 古厝街 老街古厝滿四界
古厝有懸嘛有低 古式建築真豔麗

大社街 鐵馬街 跔踏車店真正濟
老街雖罔有較狹 街路濟牛濟鐵馬

大社街 醫館街 醫病醫心閣安家
內科外科攏總會 到厝服務好性地

大社街 藥房街 老街藥房嘛真濟
漢藥西藥在你買 藥品使用愛控制

大社街 冰店街 熱天可口清涼劑
冰店人客踢倒街 芋冰礮冰攏好賣

大社街 百貨街 街路百貨逐項賣
賣衫賣褲嘛賣鞋 嘛有靴管佻雨笠

大社街 米絞街 絞米聲音傳四界
一袋絞了閣一袋 糴米家己紮布袋

大社街 雜貨街 老街雜貨有夠濟
飲料乾料攏有賣 有油有鹽嘛有茶